

**D.R. 24/2005**

**RANG UNDANG-UNDANG**

*b e r n a m a*

Suatu Akta untuk meminda Perlembagaan Persekutuan.

**DIPERBUAT** oleh Parlimen Malaysia seperti yang berikut:

**Tajuk ringkas dan permulaan kuat kuasa**

1. (1) Akta ini bolehlah dinamakan Akta Perlembagaan (Pindaan) (No. 2) 2005.

(2) Kecuali perenggan 3(b), Akta ini mula berkuat kuasa pada tarikh yang ditetapkan oleh Yang di-Pertuan Agong melalui pemberitahuan dalam *Warta*.

(3) Perenggan 3(b) disifatkan telah mula berkuat kuasa pada 10 Oktober 2003.

**Pindaan Perkara 46****2. Perlembagaan Persekutuan dipinda dalam Perkara 46—**

- (a) dalam Fasal (1), dengan menggantikan perkataan "dua ratus sembilan belas" dengan perkataan "dua ratus dua puluh dua"; dan
- (b) dalam Fasal (2)—
  - (i) dalam perenggan (a), dengan menggantikan perkataan "dua ratus enam" dengan perkataan "dua ratus sembilan"; dan
  - (ii) dalam subperenggan (xi), dengan menggantikan perkataan "dua puluh lapan" dengan perkataan "tiga puluh satu".

**Pindaan Perkara 121****3. Perkara 121 Perlembagaan Persekutuan dipinda—**

- (a) dalam perenggan (a) Fasal (1), dengan menggantikan perkataan "Kuala Lumpur" dengan perkataan "mana-mana tempat di Negeri-Negeri Tanah Melayu yang ditentukan oleh Yang di-Pertuan Agong"; dan
- (b) dalam Fasal (1B) dan (2), dengan menggantikan perkataan "Kuala Lumpur" di mana-mana terdapat dengan perkataan "mana-mana tempat yang ditentukan oleh Yang di-Pertuan Agong".

**Pindaan Perkara 124****4. Perkara 124 Perlembagaan Persekutuan dipinda—**

- (a) dengan memasukkan selepas Fasal (2) Fasal yang berikut:
  - "(2A) Seseorang yang mengangkat sumpah apabila menjadi Presiden Mahkamah Rayuan hendaklah berbuat demikian di hadapan hakim kanan yang ada bagi Mahkamah Rayuan.";
- (b) dalam Fasal (4), dengan menggantikan perkataan "Tertakluk kepada Fasal (3), seseorang" dengan perkataan "Seseorang";

(c) dengan memasukkan selepas Fasal (4) Fasal yang berikut:

"(4A) Seseorang yang mengangkat sumpah apabila menjadi hakim Mahkamah Rayuan hendaklah berbuat demikian di hadapan Presiden Mahkamah Rayuan atau, jika Presiden Mahkamah Rayuan tidak ada, di hadapan hakim yang kanan selepasnya yang ada bagi Mahkamah Rayuan."; dan

(d) dalam Fasal (5), dengan memotong perkataan "Mahkamah Rayuan atau".

### **Pindaan Perkara 125**

5. Perkara 125 Perlembagaan Persekutuan dipinda—

(a) dalam Fasal (3), dengan menggantikan perkataan "Fasal (3A)" dengan perkataan "Fasal (3B)";

(b) dengan menggantikan Fasal (3A) dengan Fasal yang berikut:

"(3A) Jika seseorang hakim telah melakukan pelanggaran mana-mana peruntukan kod etika yang ditetapkan di bawah Fasal (3B) tetapi Ketua Hakim Negara berpendapat bahawa pelanggaran itu tidak mewajarkan hakim itu dirujuk kepada tribunal yang dilantik di bawah Fasal (4), Ketua Hakim Negara boleh merujuk hakim itu kepada suatu badan yang ditubuhkan di bawah undang-undang persekutuan untuk mengendalikan pelanggaran itu.";

(c) dengan memasukkan selepas Fasal (3A) Fasal yang berikut:

"(3B) Yang di-Pertuan Agong atas syor Ketua Hakim Negara, Presiden Mahkamah Rayuan dan Hakim-Hakim Besar Mahkamah Tinggi boleh, selepas berunding dengan Perdana Menteri, menetapkan secara bertulis suatu kod etika yang hendaklah juga mengandungi peruntukan tentang tatacara yang hendaklah diikuti dan sanksi yang boleh dikenakan selain pemecatan seseorang hakim daripada jawatannya di bawah Fasal (3), berhubung dengan pelanggaran mana-mana peruntukan kod etika itu.

## *Rang Undang-Undang*

- (3c) Kod etika yang ditetapkan di bawah Fasal (3B) hendaklah dipatuhi oleh tiap-tiap hakim Mahkamah Persekutuan dan tiap-tiap pesuruhjaya kehakiman."; dan
- (d) dalam Fasal (4), dengan menggantikan perkataan "Tribunal tersebut" dengan perkataan "Tribunal yang dilantik di bawah Fasal (3)".

---

### HURAIAN Rang Undang-Undang ini

bertujuan untuk meminda Perlembagaan Persekutuan.

2. *Fasal 1* mengandungi tajuk ringkas dan peruntukan mengenai permulaan kuat kuasa Akta yang dicadangkan.
3. *Fasal 2* bertujuan untuk meminda Perkara 46 Perlembagaan Persekutuan untuk menambah bilangan ahli Dewan Rakyat ekoran penyempadanan semula bahagian pilihan raya Negeri Sarawak yang dijalankan oleh Suruhanjaya Pilihan Raya dari 17 Januari 2005 hingga 10 Jun 2005. Tambahan yang dicadangkan adalah daripada dua ratus sembilan belas ahli kepada dua ratus dua puluh dua ahli.
4. *Fasal 3* bertujuan untuk meminda perenggan (a) Fasal (1) dan Fasal (1B) dan (2) Perkara 121 Perlembagaan Persekutuan bagi membolehkan Yang di-Pertuan Agong menetapkan tempat bagi pejabat pendaftaran yang utama bagi Mahkamah Tinggi di Malaya, pejabat pendaftaran yang utama bagi Mahkamah Rayuan dan pejabat pendaftaran yang utama bagi Mahkamah Persekutuan. Peruntukan sedia ada menyatakan bahawa Mahkamah-Mahkamah yang berkenaan hendaklah mempunyai pejabat pendaftaran utama masing-masing di Kuala Lumpur.
5. *Fasal 4* bertujuan untuk meminda Perkara 124 Perlembagaan Persekutuan bagi mengadakan peruntukan yang berasingan dan khusus tentang tatacara mengangkat sumpah bagi Presiden Mahkamah Rayuan dan hakim Mahkamah Rayuan yang baru dilantik.
6. *Fasal 5* bertujuan untuk meminda Perkara 125 Perlembagaan Persekutuan untuk membenarkan Ketua Hakim Negara merujuk seseorang hakim yang melanggar mana-mana peruntukan kod etika sebagaimana yang ditetapkan oleh Yang di-Pertuan Agong kepada suatu badan yang ditubuhkan di bawah undang-undang persekutuan. Kod etika yang ditetapkan hendaklah juga mengandungi peruntukan mengenai tatacara yang hendaklah dipatuhi dan sanksi yang boleh dikenakan selain pemecatan seseorang hakim daripada jawatannya.

### IMPLIKASI KEWANGAN

Rang Undang-Undang ini akan melibatkan Kerajaan dalam perbelanjaan wang tambahan yang amaunnya tidak dapat ditentukan sekarang ini.

[PN(U<sup>2</sup>)2487]